



23. juli 2013

UKA 2013/64

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqummiuppara.

**Soraarnerussutisiaqarluni ukiut angunerini annertuumik innarluutillit ikiorserneqarnissaat pillugu maleruagassat tunngavigalugit pisinnaatitaaffiisa annaaneqannginnissaanut isumannaarinninnissamut, Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaq Agathe Fontain, Inuit Ataqatigiit)

### **Tunngavilersuut:**

Ukiut arlaqanngitsut ingerlanerini inuit, suli utoqqaligatik innarluuteqalersartut amerliartuinnarput. Tamanna ilaatigut peqquteqarpoq, ukiuni kingullerni, nunatsinni inooriaatsimik tunngaveqartumik nappaateqalersarnerup annertusiartuinnarnera.

Timikkut innarluuteqalersartut saniatigut, nunatsinni tarnimikkut innarluuteqalersartut ajoraluartumik aamma amerliartuinnavipput.

Inuit taamatut timikkut tarnikkullu innarluuteqalersimasut, nakorsamiit naliliiffigineqareermikkut annertuumik innarluutillit ikiorserneqartarnerat pillugu Inatsisartut peqqussutaat nr. 7, 3. nov. 1994, kingusinnerusukkullu allannguuteqartarsimasup, ataani aalajangersakkat malillugit ikiorserneqartarput. Tassani timikkut tarnikkulluunniit innarluutillit pisinnaasaqassusertik naapertorlugu, sapinngisamik naliginnaasumut qanittumik inuuneqartinneqarnissaat qulakkearniarneqartarluni.

Malittarisassat atuuttut periarfissiipput, innarluutillit 65-t ataallugit ukiullit innarluuteqarnerminnut atatillugu, aningaasartuutiginerusartakkaminnut tamangajalluinnarnut ikiorserneqarsinnaanerinnut. Ukiulli 65-t angugaangamikkut utoqqalinersiuteqalersutut inissinneqaraangamik, malittarisassat allat - tassalu inummut tapit atuuttussanngortinneqartarput.

Nalunngilarput nunatsinni kommuunit, inunnut tapinut tunngatillugu tapiissuteqartarnerat assigiinngitsorujussuusoq. Tamanna inunnut innarluutilinnut ajornartorsiortitsisarpoq, tassami kommuunit ilaat akissaqarneq ajormata, innarluutilittatik pitsaasumik sullisissallugit. Imaanngitsoq sullikkumannnginnamikkut. Nalunngilaat sullissatik innarluutillit, 65-inik ukioqa-leraluarlutik suli innarluuteqartut, sulilu pisinnaasaqassusertik naapertorlugu sapinngisamik naliginnaasumut qanittumik inuuneqartinneqarnissaat pisussaaffiusoq, aammalu inuup innarluutillip pisinnaatitaaffigaa.

Taamaattumik inuit 65-t angusimanagit innarluuteqalersimasut, annertuumik innarluutillit ikiorserneqartarnerat pillugu, Inatsisartut peqqussutaata ataaniittut, siunissami 65-t angugaluarunikilluunniit peqqussutip taassumap ataaniiginnarnissaannik aalajangiiffigisassamik Inuit Ataqatigiit siunnersuuteqarpugut.

**Pisortanut aningaasatigut allaffissornikkullu kingunerisassa**

Pisortanut allaffissornikkullu aningaasatigut, siunnersuut kinguneqassaaq. Innuttaasut 65-nik ukioqalersimasut annertuumillu, timikkut tarnikkulluunniit innarluuteqalersimasut, ikiorserneqarsinnaalerpata tamanna aningaasatigut sulisutigullu, annertunerusumik atuiffiulissasoq naatsorsuutaasariaqarpoq.

**Namminersorluni inuussutissarsiuteqarnermut aningaasatigut allaffissornikkullu kingunerisassa**

Soqanngilaq

**Innuttaasunut aningaasatigut allaffissornikkullu kingunerisassa:**

Utoqqaat innarluutillit innarluutiminnut atatillugu, sapinnginnerunissaat anguniarlugu ikiorserneqarunik, sapinngissusertik tunngavigalugu suliffeqarfinni atorneqarsinnaanissaat ammaanneqarsinnaavoq.